

明

史

明史卷十八

本紀 八

穆宗

穆宗諱載坫世宗第三子也嘉靖十六年正月壬寅生十八年二月庚子朔封裕王莊敬太子薨傳次當在帝而世宗以二儲繼歿心不欲遽立帝既長與弟景王並出居王邸居處服物無別異論頗起其後世宗春秋高益惡言建儲事中外危疑世宗乃令景王之國以安人心四十五年十二月庚子世宗崩壬子帝遵遺詔即位大赦天下以明年為隆慶元年召用建言得罪諸臣卹錄其死者執方士王金等治以罪

罷一切齋醮工作及內外採買織造諸務免明年天下田賦之半又盡免嘉靖四十三年以前逋賦凡先朝政令不便于民者悉改之

隆慶元年春正月辛酉都給事中胡應嘉等請如宣德以前故事日御文華殿與大臣面議政事仍令科臣隨入未合者得以指陳不聽癸亥詔定郊社諸典禮罷睿宗明堂配享辛未高燿罷丙子南京禮部尚書葛守禮為戶部尚書戊寅撤西苑諸宮殿亭臺題額二月乙未立妃陳氏為皇后吏部左侍郎陳以勤為禮部尚書兼文淵閣大學士禮部右侍郎張居正

為吏部左侍郎兼東閣大學士並入閣預機務丁酉  
禁偽錢己亥封乳母柴氏奉聖夫人乙巳罷睿宗玉  
芝宮享祀寇犯廣寧邊總兵官王治道敗之三月乙  
酉寇犯遼陽邊指揮王承德戰歿夏四月丙申趙炳  
然罷庚子以南京兵部尚書郭乾為兵部尚書壬子  
黃光昇罷五月戊午南京吏部尚書毛愷為刑部尚  
書甲子寇犯大同叅將劉國禦却之丁丑高拱罷六  
月甲申朔寇犯朔州叅將麻錦等禦却之戊子葛守  
禮罷甲午南京戶部尚書馬森為戶部尚書戊戌以  
淫雨修省素服避殿御皇極門視事秋七月丁卯命

兵部侍郎遲鳳翔督修薊遼邊牆戊辰寇入得勝堡  
遊擊麻貴賈國忠等分道却之八月癸未朔幸太學  
釋奠於先師孔子辛卯增築宣府城甲辰免順天永  
平災賦九月癸亥俺荅陷石州殺知州王亮采壬申  
土蠻由界嶺口入大掠昌黎樂亭撫寧盧龍諸縣遊  
騎至于灤河劉燾等分道禦之癸酉寇入延綏威武  
常樂總兵官趙竒等禦却之甲戌郭朴罷免襄陽諸  
府災賦乙亥總兵官李世忠敗寇于撫寧之南時俺  
荅留石州縱掠交汾諸處命保定巡撫曹亨河南巡  
撫劉應節延綏總兵官趙竒等分道救之京師戒嚴

冬十月乙酉郭乾罷丙戌俺荅土蠻並出塞京師解  
嚴丁亥總督三邊兵部左侍郎霍冀爲尚書戊子免  
昌黎諸縣被寇者稅糧丙申逮山西巡撫王繼洛總  
兵官申維岳薊鎮巡撫耿隨卿總兵官李世忠下獄  
謫戍有差甲辰河套寇謀犯固原寧夏總兵官雷龍  
靈州叅將何其昌出塞邀擊敗之十二月丁亥詔復  
海運餉遼東

二年春正月癸丑寇犯靖虜城白草原壬戌革正一  
真人號奪其印以張國祥爲上清觀提點己卯杖給  
事中石星黜爲民二月庚寅命廷臣薦舉邊才丁酉

寇犯柴溝堡新莊守備韓尚忠迎戰死之己亥耕籍  
田丁未詣天壽山謁諸陵庚戌親祭長陵永陵即日  
還宮免所過稅糧十之三三月丁巳大同總兵官孫  
吳與叅將方琦等出塞襲寇于亂子山破之命中官  
李佑往督蘇杭織造辛酉立皇子翊鈞爲皇太子大  
赦天下乙丑策試天下貢士賜羅萬化等四百二人  
進士及第出身有差夏四月辛巳罷承天元祐宮贍  
田徵其租供漢江築隄費丙申修禁門城樓濬御河  
五月丙子遣中官趙玠往南京織造戊寅遣大臣巡  
邊六月己丑陝西地震命巡撫張祉祭告西嶽華山

西鎮吳山之神賑卹難民秋七月丙寅徐階致仕九月甲寅命右副都御史龐尚鵬總理九邊屯鹽辛酉雷禮罷己巳總理河道工部尚書朱衡還理部事冬十月戊戌寧夏把總哮拜邀套部于山後太青山擊敗之己亥廢遼王憲燁爲庶人錮高墻是月免保定鳳陽金華開封臨洮諸府災賦十一月己酉免台州災糧壬子宣府總兵官馬芳襲寇于長水海子敗之師還又敗之鞍子山辛酉免江西災賦十二月辛卯詔趣購各色寶石珍珠馬森極諫給事中魏時亮等固爭之俱不報庚子以災異修省

三年春二月丙子馬森罷南京戶部尚書劉體乾為  
戶部尚書庚辰免西安諸府災糧戊子罷中官閱視  
京營三月乙巳朔賑西安鳳翔慶陽平涼延安饑夏  
四月甲申選民間女子三百人入宮己丑套部綽力  
兔等糾衆沿河住牧寧夏總兵官雷龍出邊襲破之  
五月甲寅杖御史詹仰庇黜為民秋七月乙酉命有  
司修積穀備荒之政丙戌賑河間諸府饑壬辰賑沿  
河被災州縣仍免其稅糧八月壬子賑東鹿水災壬  
戌禮部尚書掌詹事府趙貞吉兼文淵閣大學士入  
閣預機務丁卯南京浙江山東水發淮浙鹽銀及臨

清德州倉糧賑之冬十月免浙江河南災賦十一月  
庚辰京師地震有聲詔百官修省乙未高儀罷是月  
免畿內災賦十二月己亥朔以災異頻仍命殿衛密  
訪部院政事壬寅掌詹事府禮部尚書殷士儋回部  
管事乙卯楊博罷庚申起高拱入閣辦事兼掌吏部  
乙丑杖尚寶司丞鄭履淳下之獄

四年春正月丁酉王廷罷二月己亥朔趙貞吉掌都  
察院事辛丑毛愷罷壬寅免廬州災糧辛亥起葛守  
禮爲刑部尚書乙卯霍冀罷乙丑更京營制分設三  
大將領之丁卯南京戶部尚書郭乾爲兵部尚書夏

四月乙巳俺荅分部寇宣府大同山西諸將拒却之  
辛酉命戶部辦珍寶五月癸酉杖李己及給事中陳  
吾德己下之獄六月庚子免太原平陽潞安及澤遼  
沁被災逋賦秋七月己卯劉體乾罷壬午戶部左侍  
郎張守直爲尚書戊子陳以勤罷乙未免四川災賦  
八月庚戌俺荅辛愛大舉入寇京師戒嚴九月癸酉  
陝西大水命州縣發倉賑濟仍免其稅糧壬午免武  
昌黃州德安承天荊州岳州保定真定廣平大名河  
間災賦癸未套寇犯蒿溝堡大同副總兵錢棟等戰  
歿戊子辛愛犯錦州總兵官王治道叅將郎得功戰

歿甲午復京營舊制冬十月癸卯俺荅孫把漢那吉  
來降詔以爲指揮使辛亥詔京營協理大臣闡館教  
習勲胄以儲將才癸亥兵部添註二侍郎甲子俺荅  
辛愛入犯宣府總兵官趙岢及副總兵劉國叅將葛  
奈等擊却之十一月辛未賑湖州水災仍免其田糧  
丁丑俺荅令辛愛罷兵遣使請和以求把漢那吉乙  
酉趙貞吉罷己丑禮部尚書殷士儋兼文淵閣大學  
士入閣預機務庚寅改葛守禮爲左都御史癸巳南  
京禮部尚書潘晟爲禮部尚書南京兵部尚書劉自  
強爲刑部尚書十二月丁酉俺荅執叛人趙全李自

馨等九人來獻詔遣把漢那吉北歸且厚賜之乙卯  
全等伏誅

五年春二月甲午命廷臣及朝覲官謁皇太子于文  
華左門壬子遣中官督造陝西羊羴己未封皇子翊  
鏐爲潞王三月丙子策試天下貢士賜張元忭等三  
百九十六人進士及第出身有差丁丑郭乾罷己丑  
封俺荅爲順義王起楊博理兵部事夏四月壬辰朔  
詔饒州燒造磁器十餘萬辛亥增築寧夏邊牆墩臺  
詔授俺荅弟昆都力哈子辛愛並爲都督同知賓兔  
等六十一人授指揮以下官有差五月壬戌朔廣西

古田獐賊平。戊寅李春芳罷。丁亥命買金寶諸物供  
御。六月辛卯朔以京師地震三詔百官修省。甲辰授  
吉能爲都督同知其部下授官有差。丁未古田賊首  
韋銀豹伏誅。甲寅順義王俺荅及昆都力哈等貢馬  
帝御殿受賀。告于郊廟社稷。丙辰俺荅執趙全餘黨  
趙宗山等十三人來獻。秋八月癸卯許套部互市于  
紅山寨。閏門之下。九月丁卯薛瑄從祀先聖廟庭。辛  
巳免新安銅陵諸州縣災賦。乙酉遣錦衣官募浙江  
兵戍薊鎮。冬十月乙巳免安吉孝豐歸安武康災賦。  
丙辰造鰲山燈。十一月己巳殷士儉罷。十二月辛亥

命雲南採辦珠寶

六年春正月己未詔雲南廣東歲進寶石二萬塊珠  
八千兩丙子給俺荅金字番經並遣喇嘛僧傳習之  
二月甲午皇太子冠丙申倭犯化州石城陷錦囊所  
又陷神電衛掠吳川陽江高州海豐惠潮間山寇黃  
朝太等復起詔總督殷正茂討之辛亥遣內臣往蘇  
杭織造閏二月壬戌辛愛掠車彝革固等帳詔詰責  
之丁卯御皇極門疾作遽還宮三月戊子皇太子出  
閣講學庚子連把孩歹青犯長勝堡守備范芝迎戰  
敗之復犯清河堡守備曹簋等又大敗之乙巳潘晟

罷丙午總漕王宗沐條上海運七事詔從其議夏四月戊辰掌詹事府禮部尚書高儀兼文淵閣文學士入閣預機務壬申吏部左侍郎掌詹事府呂調陽爲禮部尚書五月丙午帝疾增劇己酉大漸召大學士高拱張居正高儀受顧命庚戌崩年三十六秋七月丙戌上尊謚曰契天隆道淵懿寬仁顯文光武純德弘孝莊皇帝九月壬寅葬昭陵

論曰帝秉衷淵密舉先朝秕政無難悉革而罷之雖措施未見光大而萬幾在宥穆穆皇皇所由與鋪張煩擾者異矣乃享年不永惜哉

明史卷十九

本紀十九

神宗上

神宗諱翊鈞穆宗第三子也母曰李貴妃嘉靖四十二年八月癸亥生隆慶二年三月辛酉立爲皇太子幼岐嶷穆宗嘗馳馬宮中諫曰陛下天下主馬必雙控徐行示威重若獨騎加鞭寧無銜蹶憂穆宗下馬勞之曰汝言是也賜錦粧十匹陳皇后病居別宮每晨朝穆宗訖即隨貴妃往候起居后聞履聲輒喜由是兩宮益和隆慶六年五月庚戌穆宗崩太監馮保掌司禮監印六月甲子帝即位年甫十歲大赦天下

以明年爲萬曆元年庚午罷大學士高拱癸酉御平  
臺召張居正入見慰勞之乙亥復以楊博爲吏部尚  
書丁丑高儀卒壬午禮部尚書呂調陽兼文淵閣大  
學士入閣預機務免登州災稅秋七月甲申朔起協  
理戎政兵部尚書譚綸爲兵部尚書丁亥起吏部右  
侍郎陸樹聲爲禮部尚書初通漕運于密雲己丑敕  
兵部申倣邊防庚寅劉自強罷丙申張守直罷己亥  
勅諭文武諸臣曰比來士習澆漓官方刳缺窺伺徑  
竇鼓扇朋黨遂使朝廷威福之柄徒爲人臣報復之  
資茲用去其太甚薄示戒懲餘皆曲貸與之更始諸

臣亦宜祓除前垢共襄蕩平毋懷私以罔上毋持祿以養交若或沈溺故常堅守途轍獲罪祖宗朕不敢赦庚子上皇后尊號曰仁聖皇太后皇貴妃尊號曰慈聖皇太后辛丑總督倉場戶部尚書王國光回部管事南京兵部尚書王之誥爲刑部尚書免荊州水災稅糧九月甲戌葬穆宗于昭陵庚戌始御皇極門視事冬十月丙辰彗星見東北方至二年四月乃滅己未命兵部侍郎王遴吳百朋汪道昆分閱邊防辛酉詔停刑免台州災賦十一月壬辰免山西災賦丙午黔國公沐朝弼有罪安置南京十二月辛酉賑延

綏饑免其稅糧甲戌以大行喪未期詔罷元夕燈火  
及宮中宴

萬曆元年春正月庚子早朝有男子擅入宮門執下  
獄申嚴皇城宮殿門禁二月甲戌廣西府江猺平三  
月甲申築宣府北路邊牆丙申詔內外官各舉將才  
己亥賑大同饑頒賜番經于順義王俺答夏四月甲  
子惠州賊平丙子復曲阜孔氏世襲知縣五月癸未  
詔內外官慎刑獄六月壬申賑淮安饑秋七月丁酉  
賑荊州承天饑免其稅糧是月河決徐州八泊癸丑  
罷海運賑平陽濟南饑免其稅糧九月癸未免永清

災賦戊子楊博致仕辛卯南京工部尚書張瀚爲吏  
部尚書癸卯詔停刑冬十月庚申四川都蠻弒乙丑  
罷兵部添註侍郎十二月甲寅陸樹聲致仕甲子南  
京禮部左侍郎萬士和爲禮部尚書

二年春二月甲寅賑叙州被寇饑民仍蠲其租丁卯  
築遼東西臺墻三月癸巳策試天下貢士賜孫繼臯  
等三百九十九人進士及第出身有差夏四月丙寅  
詔內外官行久任之法五月癸巳朱衡致仕乙未詔  
增修大明律條例翰林院產白燕內閣生嘉蓮張居  
正以獻尋出白燕還之六月甲辰朔總督倉場戶部

尚書郭朝賓爲工部尚書秋七月淫雨昭陵地陷八月乙丑賑順天諸縣饑淮安揚州徐河溢傷稼竊賑有差九月甲戌免丹徒丹陽金壇靖江災賦冬十二月壬子張居正進御屏列天下疆域及文武官職名命設于文華殿後閏十二月庚寅詔罷明年元夕醵山烟火

三年春二月辛巳賑大同饑丙申命日講官記注起居夏四月壬申帝以是月日食旣書警天戒十二事于座右以自警甲午淮安揚州大水詔察地勢有司貪酷及老疾者去之撫按官各率其屬修舉實政毋

得壅蔽疾苦不以上聞六月戊辰朔杭州嘉興寧波  
紹興大風海溢滄人畜廬舍乙亥葛守禮致仕丁丑  
勅吏部三途並用壬子南京戶部尚書陳瓚爲左都  
御史是夏蘇州松江常州鎮江大水秋八月丙子禮  
部右侍郎張四維爲禮部尚書兼東閣大學士入閣  
預機務河決高郵碭山免淮安揚州鳳陽徐水災稅  
糧九月辛丑王之誥致仕癸丑改協理戎政兵部尚  
書王崇古于刑部免荊州長沙災賦戊午萬士和致  
仕甲子吏部左侍郎馬自強爲禮部尚書冬十月丁  
卯京師地再震勅羣臣修省戊辰詔停刑壬申免河

間災賦十二月辛未詔罷明年元夕鼇山烟火

四年春正月丁巳逮遼東巡按御史劉臺下獄削籍  
己未遣兵部侍郎吳道直刑部侍郎王宗沐副都御  
史邵光先分閱邊防二月己卯王國光致仕乙酉南  
京戶部尚書殷正茂爲戶部尚書三月癸亥築薊州  
昌平邊牆夏五月辛丑勅司禮太監馮保會同法司  
錄囚秋七月丁酉詔曰朕奉天子民思得良有司加  
意牧養明春當大計之期吏部其悉心訪察賢否惟  
以惠愛宜民爲最有餘虛文工趨謁剝下奉迎者必  
列下考又聞有司徵賦不分緩急槩行督趣致民流

離失所朕甚憫之戶部其分別歷年逋負更與蠲除  
明年漕粟折收十之三用寬民力甲辰修泗州祖陵  
八月壬戌幸太學釋奠于先師孔子九月河決徐州  
及豐沛睢寧金鄉魚臺單曹七縣

五年春二月乙丑賑廣西饑是月廣東羅旁徭賊平  
三月甲午復龍虎山張氏正一真人印號壬寅策試  
天下貢士賜沈懋學等三百人進士及第出身有差  
四月庚申譚綸卒丙寅改刑部尚書王崇古于兵部  
己巳改協理戎政兵部尚書劉應節于刑部五月壬  
寅重修乾清宮成秋七月丙申免淮安徐去年災賦

八月癸亥河決崔鎮閏八月辛亥劉應節罷九月甲寅朔免鎮江松江逋賦南京右都御史吳百朋爲刑部尚書癸亥免湖州台州災賦己卯張居正遭父喪詔奪情視事冬十月甲申朔免畿輔災賦丁亥王崇古罷戊子彗星見西南方壬辰協理戎政兵部尚書方逢時回部管事丁酉張瀚罷辛丑陳瓚致仕乙巳杖編修吳中行檢討趙用賢員外艾穆主事沈思考于廷中行用賢削籍穆思孝謫戊丁未杖進士鄒元標于廷謫戊戌申起王國光爲吏部尚書十一月癸丑朔以星變考察百官戊午召見張居正于平臺慰

勞之乙亥吏部左侍郎陳爝爲左都御史丙子郭朝  
賓罷丁丑免武昌漢陽災賦十二月癸未朔南京右  
都御史李幼滋爲工部尚書壬寅罷蘇州杭州織造  
六年春正月癸酉皇太后還居慈寧宮二月戊子帝  
加元服戊戌免兗州青州萊州逋賦庚子立皇  
后王氏三月甲寅禮部尚書馬自強兼文淵閣大學  
士吏部右侍郎申時行兼東閣大學士並入閣預機  
務甲子張居正以葬父歸南京吏部尚書潘晟爲禮  
部尚書夏四月壬辰免湖廣四川逋賦丙午詔戶部  
歲增金花銀二十萬五月辛亥朔吳百朋卒辛未吏

部左侍郎嚴清爲刑部尚書六月乙未張居正還朝  
召見文華殿賜休沐十日甲辰殷正茂致仕秋七月  
辛亥協理戎政右都御史張學顏爲戶部尚書乙卯  
呂調陽致仕甲子免淮安揚州徐夏稅之半壬申勅  
邊鎮出塞燒荒丙子詔江北諸府民無田者官給牛  
具開墾三年後起科八月庚辰朔免山東逋賦九月  
庚午詔蘇州諸府有司招民墾荒六年後起科辛未  
詔停刑冬十月辛卯馬自強卒十二月甲申申私鑄  
之禁

七年春正月戊辰詔毀天下書院二月丁丑築大同

屯堡敵臺三月甲子免淮安揚州逋賦夏五月丙辰  
封遼東總兵官李成梁爲寧遠伯六月乙酉詔郡王  
進封親王者本爵不許襲封著爲令辛卯詔清丈兩  
畿及山東陝西勲戚莊田秋七月蘇州松江鳳陽徐  
大水蠲賑有差乙丑罷蘇州織造八月辛丑免泗興  
化寶應山陽清河桃源鹽城災賦九月庚戌免苛嵐  
逋賦冬十月丁酉賑柳州饑十二月戊寅李幼滋致  
仕甲申南京右都御史曾省吾爲工部尚書

八年春二月辛巳賑漳州泉州饑戊子祀先農耕籍  
田三月癸卯廣西十寨賊平辛亥帝奉兩宮太后率

皇后謁山陵賜所過州縣民租甲寅還宮辛酉張居  
正疏歸政帝慰留之甲子策試天下貢士賜張懋修三  
百人進士及第出身有差夏四月癸酉賑江北饑五  
月丙子濬白溝河六月己酉免廣東逋賦秋七月乙  
未免順天逋賦冬十月辛丑汰內外冗官乙巳賑蘇  
州松江常州鎮江懷慶饑十一月丙子詔度民田十  
二月癸卯潘晟致仕庚戌刑部左侍郎徐學謨爲禮  
部尚書

九年春正月癸酉寇圍錦州掠松山杏山遊擊周之  
望等敗殺甲戌復入長寧堡副總兵曹簞擊却之己

卯命翰林官分番入直甲申李成梁出塞襲土蠻大  
破之三月丙寅大閱是月寇入遼陽曹簠禦之敗績  
夏四月丁酉賑平陽饑庚子方逢時致仕丁未總督  
薊遼兵部尚書梁夢龍回部管事乙卯賑江北江南  
饑戶部進萬曆會計錄五月丙寅免從化增城龍門  
水災稅糧秋七月己巳福安大水沒官民廬舍九月  
丁亥詔停刑冬十月戊戌賑大同饑己亥土蠻大舉  
犯廣寧義州縱掠五日始去十一月丙寅賑金鄉魚  
臺饑丙戌免真定順德廣平災賦

十年春二月癸巳順義王俺答卒丁酉詔免天下積

年通賦三月庚午築山西邊牆丙戌賑惠州饑是月  
秦寧衛速把亥寇義州李成梁擊斬之夏四月甲午  
寧夏土軍馬景等作亂殺叅將許汝維巡撫晉應槐  
討誅之己亥京師旱疫勅羣臣修省遣官祭天地社  
稷山川丙辰彗星見西北方歷二十餘日始滅五月  
庚申免先聖及先儒朱熹李侗羅從彥蔡沈胡安國  
游酢真德秀劉子翬功臣楊榮後裔賦役有差六月  
乙巳起禮部尚書潘晟兼武英殿大學士吏部左侍  
郎余有丁爲禮部尚書兼文淵閣大學士並入閣預  
機務晟尋罷丙午張居正卒是月徽州嚴州建寧大

水秋八月丙申皇長子生加上兩宮太后徽號大赦  
天下丁未免陝州及湯陰涉林盧氏新安諸縣災稅  
癸丑免畿輔災賦冬十月丙申免蘇州松江水災稅  
糧丁酉王國光罷甲辰梁夢龍爲吏部尚書十一月  
乙卯朔總督薊遼兵部尚書吳兌回部管事丁巳免  
山西去年災糧十二月戊子魯省吾罷辛卯梁夢龍  
罷壬辰馮保謫奉御籍其家乙巳南京戶部尚書楊  
巍爲工部尚書丁未嚴清爲吏部尚書賑陝西饑  
十一年春正月己未南京兵部尚書潘季馴爲刑部  
尚書辛酉京師風霾詔慎邊防是月緬甸寇雲南閩

二月甲子封黃台吉爲順義王乙丑帝率后妃謁山陵行春祭禮辛未還宮免所過州縣田租三月甲申削張居正上柱國太師兼太子太師官階丁酉策試天下貢士賜朱國祚等三百人進士及第出身有差丁未吳兌罷庚戌賑山西饑夏四月癸丑改戶部尚書張學顏于兵部丁巳張四維以憂去己未吏部左侍郎許國爲禮部尚書兼東閣大學士入閣預機務庚申改工部尚書楊巍于戶部丙寅起致仕協理戎政兵部尚書楊兆爲工部尚書甲戌承天大雨水江溢入城乙亥陝西金州大雨水河溢城沒秋七月甲

申嚴清致仕庚寅改戶部尚書楊巍于吏部辛卯陳  
爍罷庚子南京吏部尚書趙錦爲左都御史南京兵  
部尚書王遴爲戶部尚書八月壬子免平陽汾州遼  
災賦九月甲申帝率后妃謁山陵作壽宮于大峪山  
己丑還宮冬十月癸亥詔停刑辛未徐學謨罷河南  
湖廣大水蠲賑有差丁丑吏部左侍郎陳經邦爲禮  
部尚書十一月甲申免延安綏德榆林三衛被災屯  
糧辛丑免蘇州松江災賦十二月甲子以四方災異  
詔羣臣修省戊辰築山海關城庚午慈寧宮災詔羣  
臣修省丙子免臨洮延安被災逋賦

十二年春正月雲南隴川賊平二月辛酉免淮安揚  
州鳳陽徐逋賦己巳釋建文朝忠臣外戚謫戍者三  
月己亥減江西燒造磁器夏六月己巳免延安慶陽  
平涼被災逋賦庚午詔修陝西水利秋七月己丑潘  
季馴削籍八月壬子免登州萊州逋賦丙辰榜張居  
正罪于天下九月戊子帝奉兩宮太后率后妃謁山  
陵並閱壽宮辛卯還宮冬十月丁巳詔停刑壬戌陳  
經邦致仕丁卯吏部左侍郎沈鯉爲禮部尚書十一  
月癸酉朔刑部左侍郎舒化爲尚書己丑余有丁卒  
庚寅陳獻章胡居仁王守仁從祀先聖廟庭十二月

癸卯朔無逸殿災甲辰起禮部右侍郎王錫爵爲尚書兼文淵閣大學士吏部右侍郎王家屏爲左侍郎兼東閣大學士並入閣預機務癸亥罷開銀礦

十三年春正月己丑詔停閏考法二月戊午寇犯瀋陽庚午大雩三月丁丑停內操甲申大雩戊子李成梁出塞襲把兔兒炒花大破之庚寅張學顏致仕壬辰令尚寶司少卿徐貞明兼監察御史領墾田使督治京畿水田減浙江織造及尚衣監料銀改戶部尚書王遴于兵部以南京吏部尚書畢鏞代之夏四月丙午大雩乙卯停江西燒造磁器戊午以京師大旱

帝布服步禱于南郊日跣步還宮諭諸臣曰天久不  
雨雖朕不德亦惟天下有司黷貨骫法不克養民上  
干天和自今宜慎選用復勅羣臣修實政無事虛文  
蠲天下被災田租一年乙丑虹縣湧血五月辛未朔  
詔開西安鳳翔漢中茶禁丙戌雨丁亥寇犯瀋陽遊  
擊韓元功敗歿己丑召見閣臣于平臺六月辛丑慈  
寧宮成工部左侍郎何起鳴爲尚書嵩督陵工丁巳  
免真定順德廣平大名災稅是月四川松茂諸番亂  
秋九月己巳免陽武諸縣災稅戊子王遴致仕閏九  
月戊戌朔賑鳳陽淮安饑癸卯帝率后妃再閱壽宮

于大峪山戊申還宮乙卯總督薊遼兵部尚書張佳  
循回部管事是月寇犯瀋陽蒲河中軍張良棟等敗  
歿庚申詔停刑冬十二月丁卯朔汰惜薪司內官冗  
員減四川採木三之一是月趙錦以憂去順義王黃  
台吉卒

十四年春正月癸亥南京右都御史辛自修爲左都  
御史三月丁酉以皇子生進封貴妃鄭氏爲皇貴妃  
癸卯禁部曹言事罷京畿水田庚戌策試天下貢士  
賜唐文獻等三百五十一人進士及第出身有差戊  
午以久旱遣官祭天地社稷山川勅群臣修省夏四

月辛卯盜竊文淵閣印是月寇犯遼東李成梁大破  
之五月甲寅畢鏘致仕壬戌戶部左侍郎宋纁爲尚  
書六月癸未松茂番寇平戊子賑平樂郴州潯州饑  
是夏畿輔河南山東山西陝西大旱南畿浙江江西  
湖廣廣東福建雲南遼東大水蠲賑有差秋九月壬  
辰王家屏以憂去乙卯詔停刑冬十月丙寅杖禮部  
主事盧洪春于廷削籍十二月丙子張佳胤致仕壬  
午起嚴清爲兵部尚書辭不至丁亥以久旱遣官祭  
天地社稷山川

十五年春正月壬辰發帑銀賑山西陝西河南山東

諸宗室辛丑大閱命司禮太監張誠代甲辰重修大明會典成癸丑楊兆罷丙辰何起鳴回部管事二月戊子免淮安揚州被災逋賦三月壬辰何起鳴辛自修罷戊戌兵部左侍郎石星爲工部尚書吏部左侍郎吳時來爲左都御史乙卯封擡力克爲順義王其妻三娘子爲忠順夫人夏四月庚申朔總督薊遼右都御史王一鶚爲兵部尚書京師旱大疫五月甲午遣官禱天地社稷山川戊午舒化致仕是月四川建昌番寇平六月丙寅南京兵部尚書李世達爲刑部尚書戊辰勅内外文武官冠婚喪祭宮室輿馬衣服

毋得踰制是月京師大雨壞廬舍病死人民無筭命  
順天府賑卹秋七月乙卯江北蝗江南大水山西陝  
西河南饑蠲賑有差八月庚申詔曰南北水旱災沴  
頻仍朕甚憂之近者有司貪殘蠲賑履行澤不下究  
斷獄多枉莫爲申理傷和召災職此之由今後慎擇  
守令毋縱不職撫按官舉察所屬有犯必治以稱朕  
克謹天戒至意癸亥免山東被災屯糧九月己丑詔  
停刑冬十月壬戌免順天廣平大名永平災賦  
十六年春三月壬辰詔改正景皇帝實錄去郟戾王  
號時山西陝西河南及應天蘇州松江杭州嘉興湖

州紹興並大饑疫死者無算夏四月戊午賑大名開  
封諸府饑六月東南大旱太湖水涸乙卯禁見任官  
立生祠甲子以災傷停減蘇杭織造癸酉禁有司預  
征差役銀秋七月乙卯免山東災稅八月寧夏大雪  
深四尺九月乙卯沈鯉致仕己未青海瓦剌他不囊  
入西寧殺副總兵李魁庚申帝幸大峪山閱壽陵后  
妃從乙丑還宮甲戌工部左侍郎曾同亨爲尚書崇  
督陵工戊寅吏部右侍郎朱賡爲禮部尚書冬十月  
辛巳朔甘肅兵變罷巡撫曹子登總兵官劉承嗣十  
二月庚辰免順天災賦癸未杖吏科給事中李沂于

廷削籍

十七年春二月丙申宿松盜劉汝國平三月丙辰帝不視朝自是朝講幾絕壬戌策試天下貢士賜焦竑等三百人進士及第出身有差丙寅潞王之國夏四月南畿浙江江西湖廣大旱己亥王家屏還朝五月順義王捨力克移帳西徙部落多從之將假道甘肅駐牧青海六月甲申浙江大水海溢己未以南畿浙江大旱饑發銀八十萬兩遣給事中楊文舉往賑之秋七月戊午朱賡以憂去甲子吏部左侍郎于慎行爲禮部尚書八月壬寅詔嚴匿名投揭之禁九月朶

顏衛長昂等寇遼東備禦李有年敗歿冬十月癸未  
詔停刑十二月丙申賑南充渠饑

十八年春正月甲辰朔帝不御殿召見閣臣于毓德  
宮出皇長子見之辛亥詔曰朕總攬乾綱圖維化理  
孜孜不怠近因偶疾深宮靜攝視朝稍稀然行政用  
人章奏皆朕獨斷左右近臣奉令承旨豈敢爲奸迺  
諸臣或沽名賣直謗訕君上或擾亂國是排擠端良  
彼奏此辨甲是乙非徒滋紛紜國體何在頻年天變  
民窮其過豈獨在朕自今共期洗心滌慮殫職奉公  
副朕任人圖治至意二月庚子楊巍致仕三月丙辰

改戶部尚書宋纁于吏部工部尚書石星于戶部曾  
同亨回部管事夏四月癸未京師旱詔法司錄囚甲  
申賑湖廣饑戊子遣官禱天地社稷山川五月庚戌  
以不雨遣官禱天地社稷山川吳時來以病去丁巳  
刑部尚書李世達爲左都御史甲子南京吏部尚書  
陸光祖爲刑部尚書六月己卯免真定順德廣平大  
名災稅吳時來卒是月青海火落赤真相犯洮河副  
總兵李聯芳等敗歿秋七月癸丑寇復犯河州渭源  
總兵官劉承嗣禦之遊擊李芳等敗歿寇掠內地二  
十餘日始出乙丑召見閣臣咨邊事己巳命協理戎

政兵部尚書鄭維經畧陝西四鎮及宣府大同山西邊務八月辛未革順義王椿力克市賞九月辛丑詔減織造之半丙寅削三邊總督梅友松籍陝西巡撫趙可懷總兵官劉承嗣並革職冬十月戊寅賑臨洮被兵軍民十二月甲申復遣廷臣九人分閱邊防是月河套卜失兔西犯永昌總兵官張臣逆戰三道溝大敗之

十九年春正月乙巳詔選宮人三百名緬甸寇雲南二月陝西總兵官尤繼先遣兵搗寇于莽刺川大敗之閏三月丁丑以星變勅羣臣修省四月壬子宋纁

卒丙辰改刑部尚書陸光祖于吏部是月四川四哨  
番賊作亂巡撫李尚思討平之五月己巳起趙錦爲  
刑部尚書未至卒六月壬子王錫爵歸省是夏順德  
廣平大名旱蝗蠲賑有差秋七月蘇州松江大水蠲  
賑有差八月丁酉賑河南饑王一鶚罷丁未改戶部  
尚書石星于兵部癸丑總督倉場戶部尚書楊俊民  
回部管事九月壬申許國致仕甲戌申時行致仕丁  
丑以吏部左侍郎趙志臯爲禮部尚書起禮部右侍  
郎張位爲吏部左侍郎並兼東閣大學士入閣預機  
務戊寅于慎行致仕賑嘉興湖州饑癸未禮部左侍

郎李長春爲尚書冬十月丙申揚州大水湖淮溢十  
二月甲午詔定戚臣莊田庚子延綏總兵官杜桐出  
塞勦寇大敗之丙申改協理戎政兵部尚書張國彥  
于刑部壬寅張國彥以病去丁巳起南京右都御史  
孫丕揚爲刑部尚書

二十年春正月丁亥杖戶科左給事中孟養浩于廷  
削籍是月寇入遼東遊擊栢朝翠敗歿二月甲寅鄭  
維致仕己酉寧夏致仕副總兵哮拜反殺巡撫党馨  
副使石繼芳據其城總兵官張維忠自縊三月辛未  
王家屏致仕甲戌陸光祖致仕乙亥策試天下貢士

賜翁正春等三百人進士及第出身有差戊子南京  
兵部尚書孫鑑爲吏部尚書夏四月壬寅倭犯朝鮮  
甲辰詔總兵官李如松提督陝西軍務討哱拜甲寅  
順義王椿力克擒獻叛酋史二官詔復還二年市賞  
五月倭入朝鮮王京朝鮮王李肱奔義州求救秋七  
月癸酉免陝西逋賦甲戌副總兵祖承訓率師援朝  
鮮與倭寇戰于平壤敗績遊擊史儒等皆死甲申以  
討賊無功罷三邊總督魏學曾命甘肅巡撫葉夢熊  
代之旋逮學曾下獄八月乙巳命兵部右侍郎宋應  
昌經畧朝鮮己酉詔天下督撫官選舉將才九月庚

午賑臨洮饑庚辰寧夏賊平冬十月丁亥朔真定順  
德廣平大名河間水蠲賑有差壬寅命李如松提督  
薊遼保定山東軍務充防海禦倭總兵官救朝鮮是  
月免金華衢州嚴州湖州開封汝寧災賦十一月庚  
辰李長春致仕十二月丁亥朔禮部尚書教習庶吉  
士羅萬化回部管事壬子曾同亨致仕

二十一年春正月癸亥李如松攻倭于平壤克之甲  
子南京刑部尚書辛自修爲工部尚書尋卒辛未王  
錫爵還朝庚辰詔並封皇長子皇三子皇五子爲王  
壬午李如松進攻王京遇寇碧蹄館敗績三月辛卯

以廷臣力爭寢並封之命甲寅犒東征將士夏四月  
壬寅倭棄王京遁丙午南京吏部尚書溫純爲工部  
尚書五月甲寅朔賑河間饑六月丁酉詔天下每歲  
夏月錄囚減釋輕繫如兩京例癸卯遊擊沈惟敬歸  
自金山偕倭使小西飛來請款秋七月癸丑朔孫鑰  
致仕乙卯彗星見詔諭內外羣臣修省八月己丑南  
京吏部尚書陳有年爲吏部尚書九月丙寅溫純致  
仕癸酉南京兵部尚書秉貞吉爲工部尚書冬十月  
丙申詔停刑壬寅李世達致仕十一月甲子刑部尚  
書孫丕揚爲左都御史己巳召見王錫爵于暖閣南

京右都御史趙煥爲刑部尚書十二月丙辰召宋應昌李如松還命薊遼總督顧養謙代之是月浙江大旱山東河南湖廣江北大水蠲賑有差

二十二年春正月己亥詔曰昨歲四方告災山東河南及淮徐尤甚朕念切痾瘵屢詔蠲賑而小民未蒙實惠方今吏治不務講求荒政愛養生民顧以搏擊風力爲名聲交際趨承爲職業費用侈于公庭追呼徧于閭里獄訟不止流亡莫招盜賊竊發則互相隱匿或故縱舍以避失事之愆上下相蒙爲弊滋大自今吏部考察一以安民弭盜爲撫按有司之黜陟如

有仍前欺玩者重治無赦二月癸丑皇長子出閣講  
學甲子命光祿寺丞鍾化民賞銀往賑河南及山東  
江北饑三月癸卯勅修國史夏五月辛卯禮部尚書  
掌詹事府陳于陞南京禮部尚書沈一貫並兼東閣  
大學士入閣預機務庚子王錫爵致仕六月己酉西  
華門災勅羣臣修省癸亥免大同災賦秋七月丁酉  
陳有年致仕八月戊申左都御史孫丕揚爲吏部尚  
書癸亥河套寇卜失兔深入固原遊擊史見敗歿  
月始出乙亥工部尚書秉貞吉爲左都御史九月己  
卯總督河道工部尚書舒應龍回部管事甲申羅萬

化致仕己丑朝鮮疏請封倭詔倭使小西飛入朝冬  
十月丁未吏部左侍郎掌詹事府范謙爲禮部尚書  
戊申免安慶災賦己未改南京兵部右侍郎邢夔爲  
兵部左侍郎總督川貴軍務討播州宣慰使楊應龍  
炒花犯遼東總兵官董一元追擊大破之十一月癸  
巳召見閣臣于暖閣

明史卷二十

本紀二十

神宗下

萬曆二十三年春正月癸卯封倭酋平秀吉爲日本  
王以都督僉事李宗城充正使都指揮楊方亨副之  
偕沈惟敬往三月乙未策試天下貢士賜朱之蕃等  
三百四人進士及第出身有差夏四月癸亥趙煥致  
仕戊辰舒應龍削籍五月丁丑總督宣大兵部尚書  
蕭大亨爲刑部尚書南京戶部尚書李戴爲工部尚  
書丁酉京師地震勅羣臣修省秋九月戊寅青海永  
邵卜犯西寧叅將達雲大破之乙酉詔建文朝事附

國史太祖本紀末復其年號

二十四年春正月丁丑削兩京科道官三十三人籍  
二月戊申延綏總兵官麻貴等襲寇于河套大破之  
三月乙亥乾清坤寧兩宮災勅羣臣修省是月火落  
赤犯洮河總兵官劉綎破走之夏四月己亥封日本  
使臣李宗城逃還逮下獄五月戊辰套寇西犯甘肅  
總兵官楊濬等大破之庚午復議封倭以楊方亨爲  
都督僉事充正使沈惟敬副之六月賑福州泉州漳  
州興化饑秋七月戊寅仁聖皇太后崩乙酉始命中  
官王虎戶部郎中戴紹科錦衣衛指揮張懋忠開礦

畿輔丙戌命錦衣衛指揮楊宗吾開礦河南尋命中  
官魯坤領之閏八月乙丑命中官陳增開礦山東丁  
卯孫丕揚致仕乙酉命中官王忠開礦永平九月乙  
未楊方亨至日本平秀吉不受封復發兵侵朝鮮乙  
卯葬孝安皇后己未命中官田進開礦昌黎是月河  
套着力兔犯寧夏總兵官李如栢等破走之是秋杭  
州湖州嘉興大水蠲賑有差冬十月庚午免鞏昌臨  
洮逋賦乙酉命中官張畢徵稅通州張家灣十二月  
壬申命中官張忠開礦山西曹金開礦浙江趙鑒開  
礦陝西乙亥陳于陞卒是月河決黃烟口

二十五年春二月丙寅復議東征丙子起麻貴爲備  
倭總兵官辛巳南京吏部尚書蔡國珍爲吏部尚書  
是月中官王朝徵稅天津三月乙巳山東右叅政楊  
鎬爲右僉都御史經理朝鮮軍務己酉石星罷己未  
兵部左侍郎邢玠爲尚書總督薊遼保定軍務經畧  
禦倭是月衷貞吉卒夏六月戊寅皇極中極建極三  
殿災詔廷臣修省癸未停修國史甲申遣官祭告四  
郊及宗廟社稷太歲東岳諸神是月泰山崩秋七月  
癸巳戒諭廷臣丁酉大赦天下甲辰倭入朝鮮閏山  
丙辰逮沈惟敬是月楊應龍叛掠合江綦江八月甲

戊倭薄朝鮮南原副總兵楊元棄城走倭遂犯全羅  
慶尚逼王京九月壬辰逮石星下獄與沈惟敬並論  
死是月甘肅巡撫田樂總兵官達雲襲寇于松山拔  
之拓地五百里冬十月甲戌安南黎惟潭篡位欵關  
請罪詔授爲安南都統使丙戌范謙卒十一月甲午  
炒花大入瀋陽縱掠八日始出十二月己卯麻貴破  
倭于蔚山

二十六年春正月己丑官軍攻倭于島山大潰楊鎬  
麻貴奔王京三月庚子策試天下貢士賜趙秉忠等  
三百人進士及第出身有差壬子文武羣臣具疏詣

文華門請皇長子冠婚不許夏四月癸亥貶黜吏部  
司官二十二人丁卯遼東總兵官李如松出塞襲寇敗  
歿壬申京師旱詔百官修省是月蔡國珍致仕五月丙申  
起溫純爲左都御史總督河道工部尚書楊一魁回  
部管事六月丁巳楊鎬罷戊午命中官李敬採珠廣  
東召浙江開礦中官曹全還以劉忠代之丙寅張位  
罷旋削籍丙子改巡撫天津右僉都御史萬世德經  
略朝鮮起李戴爲吏部尚書巡撫甘肅右都御史田  
樂爲兵部尚書秋七月丙戌命中官李道徵稅湖口  
魯保鬻賣兩淮餘鹽庚寅倭酋平秀吉死九月壬辰

免浙江災賦冬十月丙辰詔停刑是月總兵官董一元攻倭新寨敗績十一月戊戌倭將清正棄蔚山遁行長亦遁官軍分道進擊十二月倭寇平甲子詔內臣選淑女

二十七年春正月丁酉命中官暨祿徵稅儀真二月戊午命中官李鳳採珠雷州兼領市舶戊辰復設福建市舶司命中官高窠領之兼理礦務己巳命中官楊榮開礦雲南陳奉徵稅湖廣孫朝徵稅山西陳增兼領山東稅務魯坤兼領河南稅務織造中官孫隆兼領蘇松諸府稅務甲戌命中官丘乘雲徵稅四川

兼領礦務梁永徵稅陝西丙子命中官潘相開礦贛  
州李敬開礦廣東並兼稅務是月貴州巡撫江東之  
遣兵討楊應龍敗績三月庚辰朔命王忠兼徵密雲  
稅張畢兼徵盧溝橋稅丙戌命中官高淮徵稅遼東  
兼領礦務巳亥起兵部右侍郎李化龍總督四川湖  
廣貴州軍務討楊應龍夏四月丙辰畿輔災蠲賑有  
差癸酉臨清民變火稅使馬堂署殺其叅隨三十四  
人閏四月丙戌以倭寇平詔告天下蠲東征加派田  
賦甲午以京師久旱遣官祭告天地社稷山川詔百  
官修省丙申以皇子將婚詔取戶部銀二千四百餘

萬五月楊俊民卒丁巳戶部左侍郎陳藻禮部左侍郎余繼登並爲本部尚書六月己丑命中官沈永壽開礦廣東兼領稅務己亥揚應龍陷碁江叅將房嘉罷遊擊張良賢死之秋七月丁卯命南京守備中官邢隆劉朝用開礦寧國池州兼領南畿稅務八月甲午陝西狄道縣山崩其旁平地成小山五丁酉命張忠兼徵河東鹽稅九月乙卯石星死于獄戊午畿輔災蠲賑有差辛未沈惟敬伏誅壬申免保定河間災賦是月寇犯錦義二州縱掠七日而去冬十月壬午賑京城饑民丙戌以播州用兵命四川湖廣暫加田

賦戊子詔貴州宣慰使安彊臣討賊自贖壬辰命李  
鳳徵收廣東方物十一月己酉免河南災賦癸酉畿  
輔災發米十萬石賑恤以二十萬石平糶鳳陽災蠲  
賑有差十二月丁丑武昌漢陽民變擊傷稅使陳奉  
荊州辰州災蠲賑有差戊子賑京師就食流民

二十八年春正月戊午畿輔災蠲賑有差二月己卯  
命暨祿兼領江南北八府稅務戊午總兵官童元鎮  
進兵烏江敗績叅將楊顯等皆死夏四月甲午詔除  
京師牙稅六月己亥播州賊楊應龍平秋七月甲寅  
停征播加派田賦丙辰余繼登卒慈慶宮成冬十月

辛未朔貴州皮林苗叛命總兵官陳璘討之丙子命雲南稅監楊榮開採阿瓦孟密寶井庚子杖工科都給事中王德完于廷削籍十一月癸卯詔開遼東屯田十二月甲戌西洋利瑪竇來貢乙未御午門受播州俘

二十九年春正月壬子以播州平詔蠲四川貴州湖廣雲南逋賦除官民註誤罪二月甲戌免大同宣府災賦三月癸丑策試天下貢士賜張以誠等三百人進士及第出身有差是月武昌民變殺稅監陳奉叅隨六人火巡撫公署夏四月乙酉徵陳奉還命守備

承天中官杜茂代之丙申分播州地置遵義平越二  
府五月戊申賑保定真定廣平順德饑乙卯免保定  
河間災賦六月辛未賑順天諸府饑壬申蘇州民變  
殺稅監孫隆叅隨六人秋九月丁未趙志臯卒癸丑  
賑貴州饑戊午起禮部尚書沈鯉朱賡並兼東閣大  
學士入閣預機務冬十月乙丑朔吏部左侍郎馮琦  
爲禮部尚書己卯立皇長子常洛爲皇太子封諸子  
常洵爲福王常浩瑞王常潤惠王常瀛桂王大赦天  
下壬辰加上慈聖皇太后尊號十二月辛未詔復朶  
顏馬市寧前木市

三十年春正月沔陽潛江諸州縣災蠲賑有差己未  
以四方災異勅內外羣臣修省二月丁卯罷納貢例  
庚午免濟寧鉅野諸州縣災賦甲戌興化泉州災蠲  
賑有差己卯帝不豫召大學士沈一貫入受顧命詔  
罷礦稅釋逮繫復建言廢黜諸臣職削工部尚書楊  
一魁籍翼日疾瘳遂寢前詔閏二月丙申復河套諸  
部貢市癸卯工部左侍郎姚繼可爲尚書戊午河州  
黃河竭三月甲子陳藻致仕庚午賑宣府饑甲申戶  
部右侍郎趙世卿爲尚書夏四月辛丑順天永平災  
蠲賑有差乙己京師旱勅廷臣修省冬十月丙申孝

陵災戊戌泗盱胎諸州縣災蠲賑有差丙辰詔停刑  
三十一年春二月辛丑朝鮮國王李昖請立次子瑋  
爲世子不許壬子馮琦致仕三月乙丑詔許累朝公主  
子孫入國學夏五月戊寅鳳陽大風雷雨冰雹擊傷  
皇陵殿脊拔大木壞石坊秋八月丁亥泉州諸府大  
雨颶風作海暴漲滄沒萬餘人已酉城遵義府九月  
戊午免南昌吉安袁州瑞州臨江災賦冬十月甲申  
詔停刑丁酉免鳳陽淮安災賦十一月庚申免濟寧  
金鄉諸州縣災賦甲子妖書起詔五城大索十二月  
丙戌召見皇太子于啓祥宮賜手詔慰諭丁酉李戴

罷

三十二年春正月乙丑開加河三月甲子乾清宮成  
乙丑策試天下貢士賜楊守勤等三百人進士及第  
出身有差夏四月加河成五月乙丑命吏部右侍郎  
楊時喬攝部事癸酉雷火焚長陵明樓六月丙戌以  
祖陵變異命補闕官恤刑獄丁酉昌平水壞長陵康  
陵泰陵昭陵石梁及壇垣蟲食長陵松栢葉盡秋七  
月庚戌朔京師大霖雨陷城垣辛酉賑京師被水居  
民是月永平諸府大水滄廬舍壞邊墻八月辛丑文  
武羣臣具疏伏文華門請舉修省實政降旨切責閏

九月壬午楚府宗人蘊鈐等殺湖廣巡撫趙可懷冬  
十月己未改刑部尚書蕭大亨于兵部丁卯賑保定  
薊饑十一月辛丑以順天保定河間饑發倉儲平糶  
十二月丁巳賑京師饑民

三十三年春正月庚辰銀定反成寇鎮番總兵官達  
雲等大破之三月辛巳留京察被黜科道官夏四月  
辛亥詔楚府宗人蘊鈐等二人棄市華俊等四人賜  
自盡英燦等四十六人禁錮有差壬子刑部左侍郎  
董裕爲尚書五月丙申鳳陽大風雨毀皇陵正殿庚  
子雷擊圓丘望竿六月乙巳以雷警勅廷臣修省秋

七月戊寅諭琉球國王領封海上停遣制使著爲令  
辛巳溫純致仕戊戌詔復五路台吉貢市庚子姚繼  
可致仕八月丙午命左副都御史詹沂攝都察院事  
九月甲午昭和殿災冬十一月辛巳免淮安揚州災  
賦甲申皇太子第一子生十二月壬寅詔罷天下礦  
務以稅務領之有司輸其半內府半戶工二部乙卯  
以元孫生赦天下開宗室科目入仕之例罷採廣東  
珠池雲南寶井起南京吏部尚書趙煥爲工部尚書  
以親老不至董裕致仕是月山東河南江南災免其  
稅糧

三十四年春正月丁丑雲南指揮賀世勳等殺稅監  
楊榮火其署是月貴州苗賊平二月庚戌以皇孫生  
加上皇太后尊號三月丁酉真定順德廣平大名饑  
蠲賑有差夏四月河套火落赤糾衆犯中西二路官  
軍擊走之六月癸卯緬甸攻木邦陷之副總兵陳寅  
等不救論罪有差秋七月癸未沈一貫沈鯉致仕丙  
戌詔陝西四鎮嚴飭邊備冬十月丙申朔詔停刑十  
一月癸巳免河南二十四州縣災賦

三十五年春二月戊戌安南武德成攻雲南教化八  
寨總兵官沐勲等禦却之三月戊寅策試天下貢士

賜黃士俊等三百二人進士及第出身有差辛卯免  
河南十二州縣新墾逋賦夏四月乙未復蒙古宰賽  
貢市戊戌銀定反成犯涼州副總兵柴國柱破走之  
順義王捨力克卒五月戊子起禮部尚書于慎行兼  
東閣大學士以禮部左侍郎李廷機南京吏部右侍  
郎葉向高爲禮部尚書兼東閣大學士並入閣預機  
務己丑召王錫爵還朝辭不至六月壬辰朔黃州武  
昌鄖陽岳州常德徽州寧國太平嚴州大水壞廬舍  
没人畜無筭閏六月甲戌復朶顏長昂貢市辛巳復  
河套火落赤擺言太沙計貢市秋七月京師大雨壞

城垣廬舍壬子徵陝西稅監梁永還京乙卯賑京師  
貧民命戶部發粟平糶八月丙寅賑畿輔被水饑民  
九月甲午詔停刑冬十月癸酉賑山東饑十一月壬  
子于慎行卒十二月丁卯武定賊阿克叛攻圍雲南  
甲戌陷嵩明吏目韋宗孝死之陷祿豐知縣蘇夢暘  
死之乙酉安南賊扶安等攻圍欽州是月瓊州黎賊  
反掠萬州陵水縣

三十六年春正月壬子命中官成敬閱視京營丙辰  
安南賊復犯欽州夏四月戊辰賑山東饑六月乙酉  
徵遼東稅監高淮還京秋八月己未刑部右侍郎沈

應文爲尚書癸亥雲南巡撫陳用賓報獲叛賊阿克  
詔逮用賓及總兵官沐叡至京即訊尋下獄論死甲  
辰賑南畿及嘉興湖州饑九月丙申起孫丕揚爲吏  
部尚書冬十月癸未免武昌災賦十一月庚子蕭大  
亨致仕壬子朱賡卒十二月甲寅朔賑山東饑戊午  
免應天安慶諸府災賦

三十七年春正月己亥邊民訛言寇至羣入京師九  
門晝閉辛丑協理戎政兵部尚書李化龍回部管事  
三月辛卯拱兔陷遼東大勝堡浚入至小凌河遊擊  
于守志敗績是月日本入琉球執其國王尚寧夏五

月甲辰建寧諸府大水沒丁口十餘萬秋九月丁未  
詔停刑冬十一月丙申免應天被災逋賦是年福建  
江西大水湖廣四川河南陝西山西旱畿南六府及  
徐州以北濟南諸府蝗

三十八年春正月戊戌沈應文致仕三月辛卯策試  
天下貢士賜韓敬等二百九十八人進士及第出身  
有差夏四月辛卯京師久旱勅廷臣修省五月己酉  
遣官賣帑銀發儲分賑畿輔山東山西河南陝西福  
建四川饑民秋九月乙丑起趙煥爲刑部尚書冬十  
月乙亥免濟南青州登州萊州災賦

三十九年春二月庚子蒙古炒花以兒鄧犯紅崖青  
湖官軍拒却之夏四月戊子怡神殿災是月山東大  
旱五月辛丑雷震正陽門樓是月廣東大水六月壬  
午京師霪雨禾稼盡沒冬十月丁卯趙世卿拜疏自  
去十二月庚辰李化龍卒

四十年春正月戊午總督薊遼兵部尚書王象乾回  
部管事二月癸未孫丕揚拜疏出都丙戌詔許致仕  
三月丙午賑京師流民秋八月戊寅改刑部尚書趙  
煥于吏部九月辛亥李廷機致仕冬十月庚辰封卜  
石兔爲順義王不受甲申詔停刑十一月庚戌改總

督倉場右都御史孫瑋爲兵部尚書掌左都御史事  
四十一年春三月癸酉策試天下貢士賜周延儒等  
三百五人進士及第出身有差夏四月建泰山天仙  
金闕五月兵部左侍郎劉元霖爲尚書六月乙未卜  
石兔襲封順義王是月蒙古炒花乃蠻寇大寧秋七  
月壬戌孫瑋拜䟽出都是月京師及南畿山東江西  
河南大水八月廣西湖廣大水九月壬申吏部左侍  
郎方從哲在籍禮部左侍郎吳道南並爲禮部尚書  
兼東閣大學士入閣預機務庚辰趙煥拜䟽出都是  
月遼東大水冬十月戊子許孫瑋致仕己丑許趙煥

致仕己亥四川番獍復叛命巡撫吳用先討之十二月詔宋儒羅從彥李侗從祀先聖廟庭

四十二年春正月乙丑番獍平二月甲申南京吏部尚書鄭繼之爲吏部尚書辛卯憲聖皇太后崩己酉賑畿輔饑三月辛酉劉元霖卒丙子福王之國河南夏四月丙戌以皇太后遺命赦天下六月甲午葬孝定皇后秋八月戊戌王象乾致仕癸卯葉向高致仕丙午詔總督宣大兵部尚書徐宗濬回部管事辭不至

四十三年夏四月辛丑賑浙江饑五月己酉奸人張

差持挺入慈慶宮擊傷守門內侍被執癸酉帝御慈  
寧宮召見廷臣面諭之甲戌張差伏誅六月戊寅以  
久旱勅廷臣修省秋七月己酉賑畿輔饑甲戌詔停  
刑八月丁亥畿南山東災發粟平糶閏八月丁巳山  
東饑盜起詔留稅銀賑濟是月河套諸部分道入寇  
官軍禦之敗績癸亥免山東災賦十二月丙寅遣官  
賑山東饑

四十四年春正月乙亥吏部左侍郎李誌爲刑部尚  
書庚辰畿南六府災蠲賑有差二月壬寅朔賑淮徐  
饑戊申賑河南饑三月乙酉策試天下貢士賜錢士

升等三百五十人進士及第出身有差夏四月丙辰  
戶部左侍郎李汝華爲尚書是月河南舞陽泌陽遂  
平西平諸縣盜起山東濟南諸府蝗六月丁卯河決  
祥符朱家口秋七月乙未河套賊入寇叅將王國興  
歿歿是月陝西旱江西及南雄韶州水淮安揚州常  
州鎮江及河南安陽諸縣蝗冬十月丁未協理戎政  
兵部尚書黃嘉善回部管事詔停刑十一月己巳隆  
德殿災甲午免山東災賦是年 月我

大清太祖高皇帝稱尊號建元天命

四十五年春二月戊午京師旱帝露禱于宮中遣官

祭告天地勅廷臣修省三月乙亥賑江西饑秋七月  
丁卯吳道南以憂去九月沙計諸部寇葭州神木抵  
黃河口總兵官杜文煥等禦却之冬十月丁巳免應  
天災賦十一月丙戌宣禧宮災

四十六年春二月甲辰京師大風黃塵四塞乙巳賑  
廣東饑辛亥鄭繼之致仕三月庚午京師大風霾夏  
四月辛卯京城宣武門至正陽門河水盡赤經月乃  
止甲辰我

大清太祖高皇帝起兵克撫順千總王命印死之己酉  
遼東總兵官張承廕率師援撫順敗歿閏四月庚申

起楊鎬爲兵部左侍郎兼右僉都御史經畧遼東癸  
亥諭兵部申飭邊防丁丑京師黃霧四塞日色無光  
丙戌日旁黑氣磨盪三日乃止五月丁未

大清兵克撫安諸堡六月辛未起趙煥爲吏部尚書秋

七月戊申

大清兵克清河守將鄒儲質張旆死之八月庚申潮州

大水没人丁數萬壬申開海運達遼東九月辛亥詔加  
天下田賦畝三釐五毫乙卯長星見東南十九日而  
滅是日京師地震冬十月乙丑彗星見氏宿三十九  
日而滅十一月甲午以災異勅中外羣臣修省丁酉

刑部尚書李誌爲左都御史十二月丙辰朔禁有司  
徵耗羨丁巳河套猛克什力率部落來降

四十七年春二月乙丑經畧楊鎬誓師命總兵官李  
如栢杜松劉綎馬林分道出塞甲戌京師大風霾晝  
晦己卯東師啓行三月甲申朔杜松兵次二道關遇  
大清兵敗歿乙酉馬林敗績于裨子峪僉事潘宗顏死  
之庚寅劉綎兵出涼馬佃亦敗歿戊戌策試天下貢  
士賜莊際昌等三百五十人進士及第出身有差丙  
午起御史熊廷弼爲大理左寺丞兼河南道御史宣  
慰遼東夏四月京師河水復赤六月己巳

大清兵克開原總兵官馬林等敗歿癸酉命熊廷弼爲  
兵部右侍郎兼右僉都御史經畧遼東秋七月癸卯  
南京戶部尚書周嘉謨爲工部尚書丙午

大清兵克鐵嶺八月壬子李誌致仕癸亥逮楊鎬辛未  
大清兵克北關九月庚辰朔詔停刑戊子百官伏闕請  
帝視朝行政不報冬十月丁巳賑京師饑十一月辛  
巳趙煥卒十二月再加天下田賦畝三釐五毫

四十八年春正月庚子朝鮮告急乞援甲寅復加天  
下田賦畝二釐夏四月癸丑皇后王氏崩戊午召見  
方從哲于弘德殿六月辛未改工部尚書周嘉謨于

吏部秋七月丙申帝疾大漸召英國公張惟賢大學士方從哲吏部尚書周嘉謨戶部尚書李汝華兵部尚書黃嘉善署刑部事總督倉場尚書張問達署工部事協理戎政尚書黃克纘禮部署部事右侍郎孫如游入見弘德殿受顧命是日帝崩年五十有八九月甲申上尊謚曰範天合道哲肅敦簡光文章武安仁止孝顯皇帝十月丙午葬定陵

論曰有明當隆萬之間可稱甚盛盛極則衰道在率作以持之而已帝初以才臣爲相一切綜核振舉宇內幾于富彊旣乃倦勤流爲荒怠養成痿痺不仁之

症而國病矣神理積弱蠹蠹叢生雖有扁盧亦安所用之乎易曰天行健君子以自強不息諒哉